

Santa Rosa a ricibi bishita di

Diputado sra. Rolanda Hellburg-Makaai y ehecutivonan di TNO Caribbean y TNO Aruba



DURANTE e ultimo aña, Departamento di Agricultura, Cria y Pesca a sondea sistemanan mas moderno, pa por acumula dato y asina motiva productornan den uso di sistemanan mas moderniza den nan cunucu of hof.

Esaki a logra capta e interés di varios otro instancia, incluyendo TNO como tambe representantenan di islanan den region.

Asina recientemente, Santa Rosa tabatin e placer di ricibi bishita di sra. Rolanda Hellburg-Makaai, Diputado di Bonaire pa local ta trata Sector Primario.

Sra. Hellburg-Makaai a wordo acompaña pa un delegación di ehecutivonan di Gobierno como tambe representantenan di TNO Caribbean y TNO Aruba.

Durante nan bishita, sra. Nathalie Maduro, Directora di Santa Rosa y sr. Rene Donata, hurista p'e Departamento a reuni cu e delegación y durante un combersacion ameno, a discuti e diferente posibilidad pa por establece un relacion mas estrecho di información cu DLVV Bonaire y DLVV Aruba.

Tambe a papia referente e strategianan cu por traha pa ambos isla y con por sostene otro tambe cu por ehempel intercambio di producto y cria y información di proyectonan pertenente n'e Seccion di Pesca.

Pa loke ta trata e proyectonan mas grandi, nan a haci un recorrido chikito den Santa Rosa, caminda nan por a mira con e trabounan ta bayendo n'e infraestructura hydroponico y den e Seccion di Horticultura.

Mester remarca cu e delegadonan a keda sumamente impresionada cu e diferente strategianan cu ta wordo ehecuta na Santa Rosa pa local ta trata e parti di estudio y implementación di maneho como tambe e diferente equipo, material, calidad di cria etc cu Santa Rosa ta brinda n'e productornan local di Aruba.

Ta spera cu den un tempo corto e representantenan di e LVV nan di tanto Bonaire, Corsou y Aruba lo por reuni pa wak con por crea un plataforma educativo cu lo por traha mas di serca cu otro.